

重修威縣志

第貳冊

威縣志卷三

輿地志下

物產

物產

芸芸萬有胥有於產不產則無物無物則乾元不大坤元不至焉吾國物產凡有二十六萬種威境土地平衍什產缺如若植而生胎而生卵而生裸而生與夫一切人爲之物雖筆禿墨瘁不能殫述茲就日所資用者與日所接觸者彙錄於左倘亦實業君子耽吟墨客之所樂觀也

植物

稷說文以爲五穀之長孝經說亦然程瑤田九穀考云稷之粘者爲秫北方謂之高粱又謂之蜀秫高大似蘆凡經言疏食者稷食也稷形大故得疏稱今威境土人謂其粉爲蜀秫麴謂其幹爲秫稽所釀之酒謂爲高粱燒段玉裁云稷長五穀故田正之官曰稷古人與社竝祀之然則稷爲高粱考之古籍詢之野老無不同者李時珍

本草綱目謂稷與黍一類二種粘者爲黍不粘者爲稷是直以爲黍稷之稷矣試問世有以稷燒酒者乎故知程氏之以稷爲高粱乃不易之論桐城吳氏著論駁之不足以服易疇之心也

麥說文麥芒穀秋種厚薶從來有穗者也管子輕重乙麥者穀之始也按威境之麥有芒者有不芒者其不芒者謂之葫蘆頭日至之時芒者先熟不芒者後熟此大較也又按郭橐駝種樹書云麥苗盛時須使人縱牧於其間令稍實則其收倍多據此則禁放麥苗一事似不必也又云凡種五穀用成收滿平定爲佳又云小麥忌戍大麥忌子此則陰陽小數不必有驗矣

禾說文曰嘉穀也以二月始生八月而熟得氣之中和故謂之禾禾木也木王而生金玉而死淮南子張昏中種穀公羊何休注未秀爲苗已秀爲禾生民詩毛傳云禾寔曰粟粟之人曰粱今俗云小米是也威境直呼爲穀子種類不一有河南烏千根義謝花黃當年陳大紅苗小紅苗諸名

黍稷本草綱目稷與黍一類二種其色有赤白黃黑數種其言不誤特以稷爲稷乃

誤耳然其誤不自李時珍蓋唐之蘇恭已然也明徐光啓農政全書引齊民要術云
凡黍稷田新開荒爲上大豆底爲次穀底爲下地必欲熟一畝用子四升三月上旬
種者爲上時四月上旬爲中時五月上旬爲下時夏種黍稷與植穀同時非夏者大
率以根赤爲候燥溼候黃場常記十月十一月十二月凍樹日種之萬不失一

自注凍樹

者凝霜封著木條也假令月三日凍樹還以月三日種之他皆倣此

刈黍欲早刈黍欲晚

自注黍晚多零落黍早不成諺曰黍青喉黍折頭

蕎麥赤莖烏粒農政全書云種之易爲工力收之不妨農時晚熟故也北方多種之
治去皮殼磨而爲麪焦作煎餅配蒜而食或作湯餅謂之河漏

俗謂河洛

滑細如粉亞於

麥麪王禎農書曰蕎麥立秋前後漫撒種卽以灰糞蓋之稠則結寔多稀則結實少
若種遲恐花經霜不結子齊民要術云立秋前後皆十日內種之日本伊豆梅原云
蕎麥有秋夏二種竝選小粒者以爲種不好肥地播種之前浸一夜則其生繁茂
玉蜀黍李時珍曰其苗俱似蜀黍而肥矮亦似薏苡高三四尺六七月開花成穗苗
心外出一苞上出白鬚垂垂久則苞拆子出羣芳譜謂粒如芡寔大而瑩白農政全
書作玉蜀黍一稱玉麥今威境人多稱爲棒子伊豆梅原云選種之法擇十分成熟

穗形完全者除其首尾而用之播種之前日和鹽一合木炭一升投種於清水中悉浮去不良者放置一日而後播之則發生速而苗健全無病害

脂麻即胡麻作芝麻者非廣雅曰胡麻一名藤宏徐光啓云一名巨勝以其角如方勝也一名方莖以莖方名一名狗蟲以形名一名油麻以其多油也葉名青囊莖名

麻黠亦作麻稽中國昔止有大麻自漢使張騫于大宛得其種故名胡麻須夫婦同種即茂盛久服之可以休糧又云月半前種者寔多而成月半後者少子而多粃四時類要云種胡麻每科相去一尺爲法李時珍曰秋間取胡麻子種畦中如生菜之法候苗出采食滑美如葵按韓退之詩云靈麻捉狗蟲然則脂麻亦可稱靈麻也

大小豆說文求豆也求象豆生之形

上象兩瓣中一畫象地下象其根

求豆古今語周初稱求戰國

時稱豆漢時稱求今則又稱豆求亦作菽爾雅戎菽詩之荏菽皆大豆也農政全書

大豆有黑黃二種齊民要術春種大豆次植穀之後二月中旬爲上時三月上旬爲

中時四月上旬爲下時地不求熟

地過熟者苗茂而寔少

收刈欲晚

以不早損失

必須耬下

種豆

性強苗深則及澤

鋤不過再葉落盡然後刈種宜用麥底王禎曰大豆當及時鋤治使之葉

蔽其根庶不畏旱大豆之黑者食而充飢可備凶年豐年可供牛馬料食黃豆可作豆腐可作醬料白豆一名菜豆粥飯皆可拌食白黃黑三種色異而用別皆濟世之穀也小豆廣雅曰小豆荅也賈思勰曰小豆有菜赤白三種小豆花曰腐婢徐光啓曰菜豆本作綠以其色名也粒大而色鮮者爲官綠皮薄粉多粒細而色深者爲油綠皮厚粉多早種者呼爲摘綠遲種呼爲拔綠以水浸溼生白芽爲菜中佳品王禎農桑通訣曰北方惟用菜豆最多農家種之亦廣人俱作豆粥豆飯或作餌爲炙或磨而爲粉或作麪材其味甘而不熱頗解藥毒乃濟世之良穀也俞貞木種樹書曰種菜豆地宜瘦赤豆小而色赤徐光啓曰共工氏有不才子以冬至死爲疫鬼畏赤豆故於是日作粥以厭之伊豆梅原曰凡大小豆皆選其幹之中部以下者爲種再以淘板除其不良者

豇豆一名降鰲莢必雙生紅色居多故名李時珍曰開花結莢必兩兩竝垂有習坎之義其子微曲如腎形所謂豆爲腎穀宜以此當之農政全書云穀雨後種六月收子收來便種再生八月又收子一年兩熟

蠶豆王禎謂爲蠶時始熟故名李時珍曰莢狀如蠶亦通玄扈先生曰蚕豆八月初種臘月宜厚壅之此種極救農家之急且蝗所不食威境煮賣者甚多

刀豆酉陽雜俎云樂浪有挾劍豆即此三月下種蔓生農政全書云清明時鋤地作穴每穴下種一粒以灰蓋之只用水澆待芽出則澆以糞水蔓長搭棚引上威境呼爲眉豆以其似眉也宋人詩云籬豆花開蟋蟀鳴意卽此也

韭說文一種而久生者也故謂之韭篆作韭象形在一之上地也五雜俎云京師有韭黃蓋地窖火炕中所成楊升庵蓺林代山云韭之美在黃本境有鬻之者信乎韭黃之爲佳味也禮內則云春用韭杜詩云夜雨剪春韭則春韭之由來尙矣

菘俗名白菜楊誠齋稱之爲水晶菜南史周顒傳所謂秋末晚菘是也埤雅菘性隆冬不凋以時長見有松之操故其字會意東坡詩白菘類羔豚又曰奴肥爲種菘蓋深嗜之也近人俞樾云南筍北菘竝稱而北菘寔勝南筍集韻菘字或作菰或作藟芥陶宏景云芥似菘而有毛味辣可生食一名辣菜一名臘菜續博物志云食芥墮淚禮內則云秋用芥儀禮公食大夫禮芥醬魚膾鄭玄注芥醬芥寔醬也今人呼爲

芥末芹說文以爲楚葵芹古作蘄徐光啓云生江湖陂澤間水芹也生平地者旱芹也二月生苗其葉對節生晉書立春日以芹芽爲菜盤相饋齊民要術云芹菜收根畦種之常令足水忌灌泔及鹹水澆之則死性易繁茂而甜脆勝野生者陶隱居曰二三月芹作莢時可作菹及熟爇食之埤雅云其氣芬芳不如蓴之美故列子謂客有獻芹者鄉豪取而嘗之蜚於口而慘於腹也

茼蒿形氣同於蓬蒿故名其字亦或作同王禎曰茼蒿者葉綠而細莖稍白味甘脆農桑通訣云二月種可爲常食其葉又可湯泡以配茶茗寔菜中之有異味者李時珍曰八九月下種冬春採食四月起莖花淺黃色如單瓣菊花結子如百成毬最易繁茂

荳蔻釋名以爲葵菜一作甜菜農桑通訣曰荳蔻作畦下種如蘿蔔法春二月種之夏四月移栽或作蔬或作羹或作菜乾無不可也本草曰莖灰淋汁洗衣其白如玉新唐書大食傳作軍達

茶羣芳譜一名苦苣一名苦菜一名天香菜陸隴其茶蓼辨謂卽今之曲曲菜農政

全書苣作蔞謂卽小雅薄言采芑之芑莖青白色摘其葉白汁出肥可生食亦可蒸爲茹

蒿苣遯齋閒覽謂出倭國有紫白二色食之能固齒一名千金菜彭乘亦云蒿菜自品國來故名以品作倭不知所本農桑通訣曰作畦下種如菠薐法但得生芽先用水浸一日置溼地上以盆碗合之候芽漸出卽種可爲常食秋社前一二日種者可爲醃菜其莖去皮食又可糟藏謂之蒿筍

山藥卽番薯也俗名山芋葉心臟形花似牽牛稍小色紫塊根橢圓兩端尖皮紫肉白味甘北方謂之紅薯其種本出交趾吳川人林懷蘭得其種以歸遍種於粵電白縣有林懷蘭祠題曰番薯林公廟周亮工閩小記又云番薯萬歷中閩人得之呂宋國者然杜工部詩云紫秧岷嶺芋又史記貨殖傳卓王孫以種芋致富王子淵僮約曰養芋曰窖芋曰發芋則此物之由來久矣本境鹿台村所產尤佳

蘿蔔一名萊菔一名紫花菥徐光啓云蘿蔔一物而四名春曰破地雖夏日夏生秋曰蘿蔔冬日土酥故黃山谷詩云金城土酥淨如練以其潔也據此則凡有七名也

又云三月下種四月可食五月下種六月可食七月下種八月可食地宜肥土宜鬆澆宜頻種宜稀密則芟之

胡蘿蔔有紅黃二種羣芳譜謂元時來自虜中故名王省曾曰胡蘿蔔伏內畦種或壯地漫種頻澆灌則自然肥大又續富國策云法王拿破侖第一時爲英所困法人飲食皆不得糖舉國苦之拿破侖懸數萬之賞諭有能于甘蔗之外另獲新法製糖者予之法人百計圖維凡六穀百果無不煎熬取汁卒無大效最後始以紅蘿蔔製成蘿蔔百斤煎糖十斤而蘿蔔之糖遂盛行於各國此紅蘿蔔或卽吾國之胡蘿蔔乎製而爲糖會當有其人也

茄本草名落蘇有紫青白三種生生經以爲性寒滑多食腹痛而下痢女人傷子宮農桑通訣曰隋煬帝改茄子爲崑崙瓜今之紫茄黃山谷所謂紫膨脝者是也白茄一名銀茄又謂渤海茄酉陽雜俎云有新羅種者色白形如雞卵按本境有之呼爲洋茄子不知產自高麗也俞貞木種樹書云種茄子時初見根處擘開搯硫黃一星以泥培之結寔倍大倍味甘而益人

蔓菁禮坊記鄭注葑蔓菁也舊稱蕪菁一名九英菰一名諸葛菜一名蒨蕪一名蕘
一名芥嘉話錄云諸葛亮所止令兵士皆種蔓菁取其纔出甲可生啖一也葉舒可
煮食二也久居則隨以滋長三也棄不令惜四也回則易尋而採五也冬有根可食
六也又溪蠻叢話云猫獠獠所產馬王菜卽諸葛菜也相傳馬援所遺故云

蔥爾雅茗山蔥說文蔥葷菜也其色蔥蔥然故名徐光啓云蔥凡四種山蔥胡蔥漢
蔥凍蔥一名扎草中有孔也王貞曰山蔥胡蔥入藥食惟漢蔥凍蔥耳漢蔥木蔥也
葉大而香薄冬卽葉枯凍蔥葉細而益香又易過冬比漢蔥爲勝一名大官蔥梁書
呂僧珍傳從父兄宏販蔥爲業旣乃棄業欲求州官僧珍曰汝等自有常分不可妄
求叨越但當歸蔥肆耳可謂知所本矣

蒜爾雅蒿山蒜說文蒜葷菜也徐光啓曰蒜有大小之異曰葫卽大蒜小曰蒜葉似
細蔥而澀頭小於蒿卽山蒜也王禎曰蒜性熱而有小毒氣極葷然以入臭肉掩臭
氣夏月食之解暑避瘴氣北方食餅不可無此崔寔曰布穀鳴收小蒜六月七月可
種小蒜八月可種大蒜

蓴菜農政全書云其莖柔葉細而根多鬚緩緩然也一名胡蓴張騫使西域始得種歸故名一名香蓴并汾之間以石勒諱胡也俗呼爲蓴菜蓴乃莖葉布散之貌俗作芡非又說文蓴屬可以香口鄭玄儀禮注蓴廉薑也潘岳閒居賦蓴菜芬芳注引韻略云蓴香菜也與蓴同

蓴臺卽菜花通俗文曰胡菜注羌隴氏胡多種此菜能歷霜雪故名或云塞外有地名雲臺戍始種此菜故名一名油菜李時珍曰開小黃花四瓣結莢收子灰赤色炒過榨油然燈甚明近人因有油利種者頗廣

藜香蘇頌曰北人呼爲藜香聲相近也陶宏景曰煮臭肉下少許卽無臭氣故曰藜香一名藜蘿陳藏器云生佛誓國佛誓卽波斯之異名

菠菜農政全書一名菠薐一名赤根又名波斯草劉賓客嘉話錄菠薐本西國中種自頗陵國將其子來今呼其名語頗訛耳深州風土記據唐會要太宗時尼波羅國獻菠薐菜謂尼波羅國卽頗陵國按尼波羅卽尼泡勒一名廓爾喀印度北之自主國前清爲中國外藩博聞錄菠菜過月朔乃生須二十七八間種之月初乃生種時

須以其子研開易浸脹

苜蓿漢書作目宿爾雅翼作木粟言其米可炊飲也郭璞作牧宿謂其宿根自生可牧牛馬也李時珍謂種出大宛漢張騫帶入中國西京雜記曰樂游苑自生玫瑰樹下多苜蓿一名懷風時人或謂光風草風在其間蕭蕭然曰炤其花有光彩故名懷風茂陵人謂之連枝草

薑說文云禦溼之菜也史記曰種千畦薑與萬戶侯等蘇頌曰薑性畏日而惡溼故秋熱則無薑初生嫩者其尖微紫名曰紫薑或作子薑宿根謂之母薑春秋運斗樞璇星散而爲薑斯則緯書荒唐不足信矣

薤爾雅曰薤鴻薤一名莖子一名薑子一名菜芝俗名野蒜王禎曰薤處處有之葉似韭而闊本豐而白深本草云雖辛不葷學道人長餌之以其能溫中通神安魂魄續筋力爾漢北海大守龔遂勸農家種薤百本民獲其利本境邵梁莊村北野生者甚夥民多採食之

金簪別於玉簪而言也一名黃花菜一名綠蔥詢之老農皆然畿輔通志作金針深

州風土記分金簪黃花菜爲二

番椒俗名辣椒辭源云一年生草高二三尺葉爲卵形端尖有長柄互生夏月開白花梗甚長寔色紅而味辣以供食用俗又名秦椒

覓說文覓菜也博雅覓菹也管子地員篇覓下於蒲本境人呼爲英英菜亦曰米穀菜本草韓保昇云覓凡六種本境所產者赤白二種爲多五色覓則錦覓雁來紅一名後庭花園圃中時或見之馬覓則馬齒菜處處有之農政全書又名五行草以其葉青梗赤花黃根白子黑故名五行草味甘性微寒

藜俗名灰菜漢書司馬遷傳藜藿之羹注藜草似蓬爾雅翼兖州蒸爲茹又可爲杖晉書山濤傳文帝以濤母老贈藜杖一枝又爾雅釋草拜藹藹郭注藹藹赤似藜俗名紅心灰菜又名灰條菜羣芳譜一名金銷妖一作天此亦藜之種類也

葶藶俗名麥蒿生長麥隴上開小黃花爾雅釋草葶藶郭注實葉皆似芥一名大室一名丁歷西京雜記葶藶死於盛夏

葵說文葵菜也俗謂之葵花菜詩豳風七月亨葵及菽是也爾雅翼葵揆也葵葉傾

風 鼎 志
日不使日照其足因知足以揆之按向日葵向日而葉粗無人食者葵菜竝不傾日
其有衛足之名者以葉皆翹舉有衛足之象也古人採葵必待露解故一名露葵古
諺云觸露不搯葵有以也夫王禎曰葵爲百菜之主四時之饌本豐而耐旱味甘而
無毒子若根則能療疾咸無棄材誠蔬茹之上品民力之資助也又有蜀葵錦葵葉
皆可食蜀葵一名戎葵俗名秬稽花一名滿朶花卽爾雅之菁也錦葵花葉皆似葵
一名蚘蚌花郝懿行爾雅義疏謂順天人呼爲回回秬稽卽毛詩之苕也

繇林說文云枲屬徐光啓云其字或作蒹或作蒹種必連頃故謂之蒹也王禎曰其
長如竹葉大如扇花黃結子蓬如橡斗李時珍曰蒹卽今白麻多生卑溼處所結定
有齒嫩青老黑子扁黑其莖輕虛北人取皮作麻以莖蘸硫黃作焠燈引火甚速自
洋火柴盛行此種營業不再見矣今惟燒莖作炭配以硝硫爲爆仗藥而已農桑通
訣云蒹與黃麻同時熟刈作束池內漚之爛去青皮取其麻片潔白如雪可織爲毯
被及作汲綆牛索或作牛衣雨衣草覆等具農家不可無者

大麻一名火麻一名黃麻爾雅翼所謂漢麻也子有班黑紋者謂之雌麻一謂苴麻

寇宗奭云麻子海東毛羅島來者大如蓮實又有蓖麻者葉似大麻蘇恭云自胡中來者莖赤高丈餘子大如皂莢吳普本草云葉有毒食之殺人植於隴頭云可避霧榨子作油可調印泥

西瓜種出西域故名五代史四夷附錄胡嶠居契丹七年自上京東去四千里至眞珠寨始食菜明日東行始食西瓜土人云契丹破回紇得此種以牛糞覆棚而種大如中國冬瓜而味甘是西瓜由嶠創見於塞外尙未入中國至宋元時漸遍天下方回詩云西瓜足解渴割裂青瑤膚文天祥詩云拔出金佩刀斫破蒼玉瓶趙甌北陔餘叢考云云

北瓜一名倭瓜保安州志云似南瓜而形長羣芳譜云形如西瓜而小色白瓢甚紅冬瓜以其至冬而熟也廣志謂之蔬蒟神仙本草謂之土芝一名白瓜齊民要術云四月中種之收時欲飽霜霜不飽則爛王禎曰冬瓜初生青綠經霜則白如塗粉肉及子皆白故謂之白瓜荊楚歲時記七月採瓜犀以爲面脂本草圖經曰犀瓣也徐光啓云瓜種最多獨此瓜耐冬經霜乃熟藏可彌年不壞

風 縣 志
南瓜李時珍云種出南番故名羣芳譜云附地蔓生結實形橫圓而堅扁色黃有紋界之微凹不可生食

黃瓜一名胡瓜陳藏器云北人避石勒諱改呼黃瓜至今因之與王瓜絕非一物徐光啓云胡瓜宜豎柴木令其蔓緣候色黃則摘若待色赤則皮存而肉消也

甜瓜王禎農桑通訣云甘肅有甜瓜大如頭枕其肉甚甘割其皮暴之柔勒賣之中土以爲贈送甘而有味魏文帝與吳質書浮甘瓜於清泉卽謂此也玄扈先生云甜瓜生者以養骨刺頂上易熟

絲瓜卽縑瓜農政全書云嫩小者可食老則成絲可洗器滌膩種法與王瓜同每日早以清糞水澆之早則早晚皆澆待蔓長用竹引上作棚

菜瓜畿輔通志一名捎瓜較黃瓜頗粗色綠而黑

瓠衛詩曰匏有苦葉幽風曰九月斷壺小雅曰幡幡瓠葉蓋一種也陸農師曰頭短大腹曰瓠細而合上曰匏似匏而肥圓者曰壺有甘苦之別甘者供食苦者充器王禎曰其爲物也蔓生而齒瓣夏熟而秋枯本草曰味甘涼無毒利水道止消渴惟苦